

Kapal mewah Equanimity tidak dibuka untuk tontonan orang ramai - Dr Mahathir
Astro Awani
11 Ogos 2018
Wan Syamsul Amly

KLANG: Tun Dr. Mahathir Mohamad berkata, kapal mewah Equanimity tidak akan dibuka kepada tontonan awam untuk mengelakkan sebarang kerosakan.

Perdana Menteri menjelaskan, sebarang kecacatan ke atas kapal itu akan menjejaskan harganya apabila dijual nanti.

"Kapal ini sangat mewah dan kita tidak mahu menjejaskan nilainya kerana kita mahu menjualnya," katanya semasa sidang media selepas membuat tinjauan kira-kira satu jam di atas kapal mewah Equanimity di Terminal Boustead Cruise Center, Pelabuhan Klang di sini, hari ini.

Dalam pada itu katanya, fasiliti kapal itu diibarat terlalu mewah dan tidak pernah dilihatnya sebelum ini.

"Terlalu mewah, apa yang kita fikir tentang kemewahan semuanya ada dalam kapal ini, semua kemudahan ada, jika anda memasuki bilik tidur utama, anda akan dapat melihat pemandangan langit," jelasnya.

Sementara itu jelas Dr Mahathir, Amerika Syarikat juga sudah mengesahkan bahawa kapal pesiar mewah Equanimity sememangnya milik Malaysia.

"Jabatan Kehakiman Amerika Syarikat (DoJ) juga mengesahkan Malaysia bukan sahaja berhak menyimpan malah juga berhak menjual kapal itu untuk meraih semua wang tersebut.

"Siasatan DoJ juga mengesahkan kapal itu dibeli oleh ahli perniagaan, Jho Taek Low menggunakan duit yang dicuri dari 1MDB," katanya.

2018Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/kapal-mewah-equanimity-tidak-dibuka-untuk-tontonan-orang-ramai-dr-mahathir-182779>